

Demanda halto pa sex cu menornan y violencia

Crimen sexual ta exige maximo persecucion pornografia

**Mester reformula relacion y acto sexual castigabel y enfermo*

**Weganan hubenil y hasta infantil ta basa riba relacion sexual*

ORANJESTAD (AAN) -- Confusion riba kico ta permisibel y no ta permisibel, ta un di e factornan cu ta conduci na e aumento espantoso di violencia sexual. Segun informante clave, no mester mira violencia sexual como un hecho riba su mes pero mester mira tur e diferente motibonan cu ta conduci na mas violencia sexual actualmente. Droga ta hunga un papel sumamente importante. Pornografia sin embargo, mester wordo considera como e motor pa e cantidad di abuso sexual actual.

"Autoridad mester reformula kico ta e diferencia entre un relacion sexual normal y kico ta un relacion castigabel. Un di e puntonan mas importante pa haya atencion directo, ta

stipulacion di kico ta cay bou pornografia y kico no. Pornografia tin un impacto grandi riba mente humano. Ta transmiti imagennan y zonido cu ta crea reaccionnan. E negoshi di pornografia ta crece tur dia pero tambe e cantidad di material cu no ta wordo considera pornografico mas."

Después cu atrobe un caso di crimen sexual a pone Aruba bati alarma grandi, DIARIO a bay trata di establece causanan cu no ta haya e publicidad cu nan merece.

Pa por atende e problema serio cu a surgi pa comunidad, mester yega na revision di ley cu a bira menos agresivo contra loke hustamente mas ta provoca e tipo di crimen aki. Den pasado tabata tin



screening di loke ta permiti of no. E tabata aplica pa pelicula, cancionnan y potret. E leyman tabata tene consideracion cu e parti mas importante di hende, cu ta e señal cu mente humano ta capta di loke hende mira, scucha, experiencia cu su sentidonan. Despues di tempo cu sexualidad a bira algo normal, a stop cu tur control y ta actua solamente ora tin cierto casonan cu por considera criminal manera uzo di mucha pa acto sexual y pornografia.

Pornografia segun informante mester ta, tur loke ta crea cerca hende reaccionnan cu por tin resultado riba relacion sexual. Semper tabata tin clasificacion di e grado di pornografia. Abuso di menornan. Violencia. Humiliacion di hende dor di actonan di perverso.

Riba medianan social por tuma nota di hopi material cu realmente ta pornografico pero no ta wordo persigui manera antes.

Segun e informante, tin video y potretnan di eventonan caminda adultonan ta dirigi weganan sexual, pero no ta wordo clasifica como tal mas. Den e weganan aki por nota participacion di mucha y hobennan cu aparentemente ta hari y ta gosa di actonan cu un base sexual cu por tin resultado serio.

No mester perde for di bista e edad na cual muchanan abiertamente ta cuminsa participa na negoshi sexual y por papia di prostitucion hubenil den cual muchanan di edad sumamente abou ya ta bende nan mes. No tin informacion adecuado riba e temanan aki, loke ta hopi peligroso. Hopi atencion ta wordo presta na enfermedad fisico sexual. Pero no ta pone debido atencion na enfermedadnan riba tereno sexual.

Tin hende cu ta sufri di maleza cu ta pone nan haci otro daño serio pa nan satisfaccion personal. Den tempo moderno tin ritualnan pa haci bo mes y otro daño.

Pa por atende e problema di agresion sexual, mester atende na loke ta conduci na abuso, segun informacion ricibi cu ta indica cu expertonan riba tereno criminal mester yuda Aruba establece prevencion dor di haci e temanan aki discutibel pero tambe reactiva leyman cu ta riba papel of hasta a scrap pero cu tabata bay na e motibo di tanto crimen riba tereno sexual.